

Ako iz bilo kojih razloga član Upravnog odbora nije u stanju da vrši svoju funkciju, ili ne može da prisustvuje sastancima Upravnog odbora u periodu dužem od tri mjeseca, izvršit će se njegov opoziv i izabrati novo lice koje će završiti preostali mandat opozvanog člana.

Član 24.

Upravni odbor se sastaje na redovnim sjednicama, u načelu, bar jednom mjesečno.

Upravni odbor se sastaje i na vanrednim sjednicama, po zahtjevu najmanje dva njegova člana.

Sjednicama Upravnog odbora može prisustvovati direktor Javnog preduzeća, koji ne može učestvovati u donošenju odluka (glasanju).

Član 25.

Pored ovlasti utvrđenih članom 12. Zakona o javnim preduzećima, Upravni odbor predstavlja Javno preduzeće u svim poslovnim odnosima sa direktorom i zaključuje ugovor o radu sa direktorom.

Upravni odbor usvaja Statut Javnog preduzeća, uz saglasnost Vlade.

Ukoliko Statutom nije drukčije regulisano, Upravni odbor usvaja i opšte akte kojima se uređuju pitanja vezana za rad i poslovanje Javnog preduzeća.

Upravni odbor donosi Poslovnik o radu (Pravila procedure).

Direktor

Član 26.

Organ rukovođenja u Javnom preduzeću je direktor.

Direktora imenuje i razrješava Upravni odbor, na osnovu konkursa, uz saglasnost Vlade.

Prava i obaveze direktora uređuju se statutom Javnog preduzeća.

Nadzorni odbor

Član 27.

Organ kontrole poslovanja u Javnom preduzeću je Nadzorni odbor.

Nadzorni odbor ima tri člana, od kojih su dva člana iz reda poslanika Skupštine Kantona, a jedan iz reda stručnih radnika zaposlenih u Javnom preduzeću.

Predsjednika i članove Nadzornog odbora imenuje i razrješava Skupština Kantona.

Član 28.

Članovi Upravnog odbora i Nadzornog odbora ne primaju platu za svoj rad.

Članovi Upravnog odbora imaju pravo na nadoknadu za njihov rad u obliku honorara, čiju visinu utvrđuje Vlada.

PROGRAMSKI SAVJET

Član 29.

Radi ostvarivanja i zaštite interesa javnosti u odnosu na utvrđivanje programa TV KS, Javno preduzeće obrazuje Programski savjet (u daljem tekstu; Savjet)

Savjet ima 9 članova, od kojih 6 članova imenuje i razrješava Vlada, a 3 člana organ upravljanja Javnog preduzeća.

Članovi Savjeta treba da imaju iskustvo u oblasti medija, kulture, nauke i umjetnosti.

Savjet po strukturi treba da odražava etnički sastav stanovništva u Kantonu.

Mandat članovima Savjeta traje dvije godine, uz mogućnost reizbora po isteku mandata.

Član 30.

Savjet bira predsjednika Savjeta iz reda članova Savjeta i donosi Poslovnik o radu (Pravila procedure).

Savjet se sastaje najmanje jednom u dva mjeseca i, ukoliko nije drukčije određeno, odluke donosi dvotrećinskom većinom.

Ukoliko to zatraži i najmanje trećina njegovih članova, može se sazvati vanredna sjednica Savjeta.

U radu Savjeta imaju pravo učestvovati direktor i predsjednik Upravnog odbora, izuzev u slučaju kada ih Savjet isključuje iz određenih razloga.

Na sjednice Savjeta obavezno se poziva glavni urednik, kada Savjet raspravlja pitanja vezana za uređivanje programa, a po potrebi mogu biti pozvani i urednici programa i drugi radnici Javnog preduzeća ili treća lica, na prijedlog članova Savjeta.

Član 31.

Savjet:

- daje mišljenje organu upravljanja Javnog preduzeća na postavljanje glavnog urednika. Ukoliko najmanje 2/3 članova ne glasaju protiv, ili ako se glasanje ne obavi u roku od tri mjeseca od datuma saopštavanja prijedloga kandidata za glavnog urednika, smatraće se da je takvo postavljanje odobreno.

- daje savjete direktoru i glavnom uredniku o pitanjima općeg utvrđivanja programa i pomaže im u izvršavanju programskih zadataka,

- nadgleda poštivanje programskih odgovornosti u Programu TV KS koje su utvrđene zakonom. U slučaju da određena emisija krši programske principe, Savjet može, uz pismeno navođenje razloga, naložiti direktoru i glavnom uredniku, nakon iznošenja njihovih stavova, da prekinu takvu povredu ili da obezbijedi da se dalje povrede ne dešavaju.

Savjet ne može revidirati pojedine programske emisije prije nego se one emituju.

PRELAZNE I ZAVRŠNE ODREDBE

Član 32.

Javno preduzeće organizirat će se i početi s radom danom upisa u sudski registar.

Član 33.

Javno preduzeće prestaće sa radom, kada se ispune u Zakonu predviđeni uslovi i odlukom osnivača.

Član 34.

Javno preduzeće donijet će statut i pravilnik o unutrašnjoj organizaciji u roku od 30 dana od dana stupanja na snagu ove odluke.

Član 35.

Vlada će imenovati vršioce dužnosti direktora Javnog preduzeća i glavnog urednika javnog medija.

Vršioци dužnosti iz prethodnog stava predstavljat će Javno preduzeće i javni medij sa svim pravima i odgovornostima direktora i glavnog urednika, do konačnog imenovanja direktora i glavnog urednika.

Član 36.

Ova odluka služi kao osnivački akt Javnog preduzeća »TV Kantona Sarajevo«, odnosno javnog medija »Program TV KS«, na osnovu kojeg će se izvršiti upis Javnog preduzeća u sudski registar, odnosno javnog medija u evidenciju medija, po pribavljanju rješenja nadležnog Ministarstva Kantona kojim se Javnom preduzeću, odnosno javnom mediju odobrava početak rada.

Član 37.

Ova odluka stupa na snagu osam dana od dana objavljivanja u »Službenim novinama Kantona Sarajevo«.

Broj 01-023-53/98

2. aprila 1998. godine

Sarajevo

Predsjedavajući

Skupštine Kantona Sarajevo

Mirsad Kebo, s. r.

Na osnovu člana 15. Zakona o zdravstvenom osiguranju (»Službene novine Federacije BiH«, broj: 30/97) i čl. 13 b 18 b Ustava Kantona Sarajevo (»Službene novine Kantona Sarajevo, br. 1/96 i 2/96 - ispravka i 3/96 - ispravka i 16/97), čl. 3. i 6. Zakona o ustanovama (»Službeni list RBiH«, br. 6/92, 8/93 i 13/94), Skupština Kantona Sarajevo, na sjednici održanoj 2. aprila 1998. godine, donijela je

**ODLUKU
O OSNIVANJU ZAVODA ZDRAVSTVENOG
OSIGURANJA KANTONA SARAJEVO**

Član 1.

U cilju ostvarivanja prava i osiguravanja sredstava iz obaveznog zdravstvenog osiguranja osniva se Zavod zdravstvenog osiguranja Kantona Sarajevo, kao javna ustanova.

Zavod posluje pod nazivom »Zavod zdravstvenog osiguranja Kantona Sarajevo«, (u daljem tekstu: Zavod).

Sjedište Zavoda je u Sarajevu, Ulica Hamdije Kreševljakovića broj 14.

Član 2.

Zavod ima svojstvo pravnog lica.

Član 3.

Djelatnost Zavoda je:

- da provodi politiku razvoja i unapređivanja zdravstvene zaštite koja se osigurava obaveznim zdravstvenim osiguranjem,
- planira i prikuplja novčana sredstva obaveznog zdravstvenog osiguranja, te plaća usluge zdravstvenim ustanovama i prihvatnim zdravstvenim radnicima,
- sredstva će se evidentirati odvojeno u skladu sa zakonom i posebnim propisom koji će donijeti Vlada Kantona,
- obavlja poslove u vezi s ostvarivanjem prava osiguranih lica, brine se o zakonitom i blagovremenom ostvarivanju tih prava te im pruža stručnu pomoć u ostvarivanju prava i zaštite njihovih interesa,
- obavlja poslove ugovaranja sa zdravstvenim ustanovama i privatnim zdravstvenim radnicima,
- određuje kriterije i način korišćenja te visinu novčanog iznosa za naknadu putnih troškova u vezi s korišćenjem zdravstvene zaštite i naknadu za pogrebne troškove,
- određuje visinu naknade plaće i najviši iznos naknade plaće na teret kantonalnog zavoda osiguranja, način valorizacije osnovice za naknadu plaća za vrijeme bolovanja,
- učestvuje u izradi i provodi međunarodne ugovore o socijalnom osiguranju u dijelu koji se odnosi na obavezno zdravstveno osiguranje,
- vrši obračun dugovanja i potraživanja troškova zdravstvenog osiguranja i druge poslove u skladu sa ovim ugovorima,
- obavlja poslove u vezi sa ostvarivanjem zdravstvene zaštite u inozemstvu, i privatnih zdravstvenih radnika saglasno zaključenom ugovoru za tekuću godinu,
- obavlja poslove izrade podzakonskih i općih akata u vezi sa ostvarivanjem prava iz obaveznog zdravstvenog osiguranja za čije su donošenje nadležni organi kantona odnosno organi Zavoda,
- uređuje ostala pitanja vezana za ostvarivanje prava iz obaveznog zdravstvenog osiguranja.

Član 4.

Radi obavljanja stručnih, administrativnih i drugih poslova Zavod osniva Stručnu sluzbu.

Unutrašnja organizacija stručne sluzbe Zavoda iz prethodnog stava, utvrđuje se Pravilnikom, kojeg donosi rukovodilac uz saglasnost Vlade Kantona Sarajevo (u daljem tekstu: Vlada).

Član 5.

Zavod može proširiti ili promijeniti djelatnost kao i vršiti statusne promjene spajanje, pripajanje, podjelu i izdvajanje.

Odluku iz stava 1. ovog člana donosi osnivač.

Član 6.

Imovinu Zavoda čine nepokretne i pokretne stvari, nad kojima je pravo upravljanja i raspolaganja imao dio Republičkog fonda za zdravstvenu zaštitu - jedinica Sarajevo, kao i novac i prava koja Zavod stiče svojim poslovanjem, sem sredstava koja po Zakonu Federacije pripadaju federalnim organima.

Član 7.

Sredstva za osnivanje i rad Zavoda obezbjeđuju se iz doprinosa i Budžeta Kantona, u skladu sa Zakonom.

Član 8.

Organ upravljanja u Zavodu je Upravni odbor.

Upravni odbor sastoji se od devet članova, koje imenuje Vlada Kantona na prijedlog kantonalnog ministra zdravstva.

Upravni odbor donosi statut Zavoda uz saglasnost Skupštine Kantona.

Član 9.

Organ rukovođenja u Zavodu je direktor.

Direktora Zavoda imenuje i razrješava Vlada Kantona, na prijedlog kantonalnog ministra zdravstva.

Član 10.

Organ kontrole poslovanja u Zavodu je Nadzorni odbor, od tri člana.

Predsjednika i članove Nadzornog odbora imenuje i razrješava Vlada Kantona.

Član 11.

Radnici Zavoda ostvaruju svoja prava u skladu sa Zakonom, statutom Zavoda i kolektivnim ugovorom.

Član 12.

Zavod je dužan donijeti statut, plan rada i finansijski plan u roku od 60 dana, a druge opće akte u roku od šest mjeseci od dana stupanja na snagu ove odluke.

Rok za imenovanje organa upravljanja je 60 dana od dana stupanja na snagu ove odluke.

Član 13.

Nadzor na zakonitošću rada Zavoda vrši Ministarstvo zdravstva Kantona.

Član 14.

Zavod je odgovoran za svoje obaveze sredstvima sa kojima raspolaže.

Osnivač Zavoda je supsidijarno odgovoran za obaveze Zavoda.

Član 15.

Na osnovu ove odluke izvršit će se upis Zavoda u sudski registar, koji se vodi kod Kantonalnog suda u Sarajevu.

Član 16.

Ova odluka stupa na snagu danom objavljivanja u »Službenim novinama Kantona Sarajevo«.

Broj 01-023-55/98

2. aprila 1998. godine
Sarajevo

Predsjedavajući

Skupštine Kantona Sarajevo
Mirsad Kebo, s. r.

Na osnovu čl. 13b) i 18b) Ustava Kantona Sarajevo (»Službene novine Kantona Sarajevo«, br. 1/96, 2/96 - ispravka, 3/96 - ispravka i 16/97), i člana 35. stav 3. Zakona o zdravstvenoj zaštiti (»Službene novine Federacije Bosne i Hercegovine« broj 29/30), Skupština Kantona Sarajevo, na sjednici održanoj 2. aprila 1998. godine, donijela je:

ODLUKU

**O PRIHVATANJU PRAVA I OBAVEZA SUOSNIVAČA
KLINIČKOG CENTRA SARAJEVO**

I

Skupština Kantona Sarajevo prihvata prava i obaveze suosnivača Kliničkog centra Sarajevo sa suosnivačima: Federacija BiH, i najmanje jedan od Kantona u Federaciji BiH.

II

Klinički centar Sarajevo čini dosadašnja Javna ustanova Klinički centar Univerziteta u Sarajevu.

III

Međusobni odnosi, prava i obaveze suosnivača Kliničkog centra regulisat će se posebnim ugovorom, u skladu sa zakonom i osnivačkim aktom.

IV

Osnivački akt Kliničkog centra Sarajevo, istovremeno sa ostalim suosnivačima i sufinansiranjem usvojiti će Skupština Kantona Sarajevo.

V

Ova odluka će se objaviti u »Službenim novinama Kantona Sarajevo«.

Broj 01-023-56/98

2. aprila 1998. godine
Sarajevo

Predsjedavajući

Skupštine Kantona Sarajevo
Mirsad Kebo, s. r.

Na osnovu člana 12.j) i 18.b) Ustava Kantona Sarajevo (»Službene novine Kantona Sarajevo«, br. 1/96, 2/96 - ispravka i 3/96 - ispravka i 6/97) i člana 2. Zakona o posredovanju u zapošljavanju i socijalnoj sigurnosti nezaposlenih lica (»Službene novine Kantona Sarajevo«, broj 22/97), te člana 3. stav 3. Zakona o ustanovama (»Službeni list RBiH«, br. 6/92, 8/93 i 13/94),